

## KONTROL MOZIOA

### UDALAK BABESTU DITUEN ELEMENTUEI DAGOKIEN TRATAERA

Amaia Almirall Lopez de Luzuriaga EH BILDU udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2017ko uztailaren 10ean Gune Publikoen eta Obra eta Hiri Zerbitzuen Batzordean aztertutako interpelazioaren ondorioa da.

### JUSTIFIKAZIOA

Apirileko udalbatzarrean jatorrizko Kontxako Barandaren etorkizuna hizpide izan zen, gaiari buruzko ekimena aurkeztu baitzuen talde honek, bai eta zinegotzi-ordezkariek azalpenak eman ere. Azalpenetan, aitzitik, zinegotzi ordezkariek ez zuen babestuta dauden elementuen inguruko aipamenik egin. 1999an baranda osorik berritu zenean, 271 piezak banan bana kendu, berritu eta berriz ere jarri ziren. Horregatik, aurtengo obrak hasi arte bertan egon diren zatiak (edo ukitu ez diren zonaldeetan daudenak) duela 100 urte Juan Rafael Alday udal arkitektoak diseinatu zituen eta bere agindupean jarri ziren berberak dira; alegia, jatorrizko piezak. Aipamen berezia ere merezi du Kontxako Erlojuetako zatien artean dagoen berezitasunak; paseoko zati guztiek duten lorea barrura begira dagoelako, baina parte horretan itsasoari begira dagoen lorea duen zatia dagoelako, eta horregatik bereziagoa.

Zinegotzi ordezkariek azaldu zuen erabakita zegoela jatorrizko pieza kendu eta beste bat jartzea; helburua zela, izan ere, molde berri bat egitea eta horrekin, hemendik aurrera, zati guztiak egitea. Esan ere esan zuen jakitun zela zonalde horretako berezitasunaz, baina nola berrituko zen oraindik ere erabakitzeke zegoela. Aurreratu zuen, halaber, kendutako zatiak udal biltegira eramateko asmoa, baina etorkizunean beraiekin zer egin ez zuela erabakita Udal Gobernuak. Batzordean ere mintzagai izan zen gai hauen ezagutza norik ote duen edo/eta nori galdetu behar

zaion. Horiek horrela, apirileko udalbatzarrean proposatu genuen elementuen inbentarioa egitea, jatorrizko piezen jarraipen egokia ziurtatze aldera, baina Udal Gobernuak ez zuen aintzakotzat hartu eskaera. Halaber, proposatu genuen Kontxako elementu babestuen inguruan adituen iritzia jasotzea, Ondarearen Inguruko Foroan eta Gipuzkoako Foru Aldundian, eta honek ere ez zuen jaso Udal Gobernuaren onespena.

Aurreikusi genuen moduan, jatorrizko piezak eskuratzeko eskaerak iristen hasi dira. Izan ere, berriki jakin dugunez, martxoan Lepeko Udalak duela 100 urteko barandaren 100 metro eskatu zizkion Donostiako Udal Gobernuari, eta antza, Eneko Goia alkateak emateko asmoa du. Pentsatzekoa da helburu ezberdina baina antzeko interesa izan dezaketen pertsona edo erakunde gehiago egon daitezkeela, bai jatorrizko pieza arruntei dagokienez, bai bereziagoei dagokienez ere, Donostian zein Donostiatik kanpora.

Horregatik guztiarengatik, jatorrizko piezen jarraibidea egin eta haien etorkizuna nolabait erregulatu beharra dago, aurreratu genuen moduan, eta gero eta ageriagoa den moduan. Orain arte, aldiz, biltegira eramango zituztela esateaz harago, irizpide falta erakutsi du Udal Gobernuak piezekin zer egingo duen eta nola egingo duen galdetu zaionean; eman, zozketatu, enkantean jarri... denetarik entzun da, udal batzordeetan eta batzordeetatik kanpo.

HOEBPE/PEPPUC-ren F babespean dauden elementuekin izan beharreko jokabideen aukerak sakonago aztertzea komeni da, beraz, erretiratzen diren jatorrizko piezekin zer egin daitekeen aurreikusiz: guztiak inbentariatu, batzuk edo guztiak gorde, batzuei bigarren erabilera eman edo birziklatu edo... Izan ere, elementu horien izaeragatik, behin baino gehiagotan jatorrizkoak kendu eta berriak jartzea suerta daiteke; baita, kentzen direnen artean, elementu guztiek balore propio edo sinboliko bera ez izatea ere. Azkeneko hauen kasuan, egiten dena egiten dela, izaera publikoa izango duten eskaintzak bideratzea (enkanteak, eskaera bidez, zozketak...) eta haiek erabiltzeko protokolo argiak izatea ez da soberakoa. Horrela edonork jakingo du zein den, kasuz kasu, egon daitekeen aukera; zein den, eta, interesa izanez gero, nola egin behar duen berdintasunean aleren bat eskuratu nahi badu.

Horiek horrela, hauxe da behean sinatzen duen zinegotziak aurkeztutako  
**MOZIOA:**

Udalbatzak eskatzen dio Udal Gobernuari, HOEBPE/PEPPUC delakoaren bidez F babespean dauden elementuak berritzerakoan:

1,- Berritze sistema egokiari buruzko iritzi kontrastatuak jaso ditzala, Udaleko sail eta arduradunetz gain (Hirigintza, Mantenimendua, San Telmo... kasuan kasu), Ondarearen inguruko Foroan eta Gipuzkoako Foru Aldundian.

2,- Behin betiko erretiratuko diren elementuen inbentarioa egin dezala, etorkizunean har daitezkeen erabakien ondoren ere elementuen jarraipena errazteko.

3,- Berritze lanetan behin betiko erretiratuko diren elementuak inbentariatu ondoren, piezen etorkizuna erabakitzeari begira, hobetsi dezala haiek gordetzea eta ondoren, eskaintza publikorako alerik geratzen bada, publikoki, garaiz eta egoki, iragarri dezala zein den pieza horiek eskuratzeko erabiliko den eskaintza publikorako sistema (enkantea, zozketa, eskaera bidez...).

Donostian, 2017ko uztailaren 14an

Amaia Almirall Lopez de Luzuriaga  
EH Bildu udal taldeko zinegotzia